

四庫全書

集部

欽定四庫全書

古今禪藻集卷十七

明釋正勉釋性通同輯

元 七言絕句

曉過西湖

圓至 十四首

水光山色四無人  
清曉誰看第一春  
紅日漸高絃管動  
半湖煙霧是遊塵

送宗侗

送子江頭水亦悲更能隨我定何時垂楊但為秋來瘦  
不為秋來有別離

小汊

麻骨燈明竹壁疎更深入語在茅廬開篷緣岸去沽酒  
點火撥船來賣魚

胡廬

胡廬河畔洗氍毹  
日日花香滿水流  
嫁得夫郎愛官職  
去隨太子取交州

女官墓

隴頭死樹丫微活路口崩亭脚半斜玉骨年深無祭祀  
變成蝴蝶撲松花

吳王廟

吳王廟近水邊山壁上雕青鬼臂蠻白日爐中煙色變  
散成雲氣滿人間

寒食

月暗花明掩竹房暮寒脈脈透衣裳清明院落無燈火

獨遶迴廊禮夜香

懷本暢上人

畏寒一月閉窓紗  
愁髮春來半欲華  
松院晚晴蜂亂出  
故應山徑有殘花

芳塘

芳塘雨霽綠初肥  
折得青條串露歸  
一樹殘花喧鬬雀  
紅香滿徑撲人飛

寄思以仁

風柳青青條葉新  
別愁江畔又逢春  
交情似我如君少  
一度相逢勝故人

見新竹懷兄姚江村

愛酒嫌官姚縣令  
長年三徑滿荒苔  
曾因養笋添窓竹  
一月柴門閉不開

土木渡阻風

空林路盡見波瀾  
輕槳何時掠水還  
日暮亂雲如宿鳥  
隨風片片泊廬山

憩青蓮寺

花磚凝潤午風涼日影鶯聲睡思長  
一陣打窓山雨過忽聞滿閣焙茶香

初改黃衣

宣詔亭前受牒還御黃新賜滿城看  
臣僧記得沙彌日齊著青衣上戒壇

山居

祖欽三首

竟日窓間坐寂寥巖前稚筍欲齊腰  
幽禽忽起藤花落

磻瀑飛聲度石橋

夾岸桃花紅欲然洞中流水自涓涓山家不會論春夏

石爛松枯又一年

古德云山僧不解數甲子一葉落知天下秋靈徹云山僧不記重陽節因

見茱萸憶去年而詞意相類全章無傳政表出之

桃源圖

春暖洞門花欲然一絲風動釣魚船莫言世上無仙客  
須信壺中別有天

過釣臺偶題

希叟 二首



奴顏婢膝走人間羞見羊裘七里灘  
文叔雖為天子貴  
子陵原作故人看

贈凱翁

曾飛鐵騎破重圍赤手揚鞭得勝歸  
沙漠已成歌舞地  
自皤雙鬢對斜暉

竹枝詞

智愚二首

隔水何人歌竹枝動人情思極幽微  
夜深轉入單于調  
月朗風高聽者稀

送別

欲把枯腸盡底傾  
出門不覺又叮嚀  
徑邊松菊荒蕪早  
莫待春風柳眼青

范蠡歸湖圖

溥光

功遂名成泛五湖  
知幾千古擅良圖  
向教勾踐堪同樂  
不識先生肯退無

雪

明本

凍雲四合雪漫漫  
誰解當機作水看  
只為眼中花未瞥

啓窓猶看玉琅玕

客中得母寄布

允恭 三首

我母今年七十強獨憐季子在他鄉寄來新截機頭布  
一寸絲麻一寸腸

昇母渡錢塘

母在籃輿子在途子行不上母頻呼斷橋流水斜陽外

一作西風落日荒山道  
羞見寒林返哺鳥

憶母

霜殞萱花淚濕衣白頭無復倚柴扉去年五月黃梅雨  
曾典眾淡貰米歸

牛怨

僧宜

七十餘城一戰收歸來只合便封侯火瘢未冷重加輓  
春雨春風暗結愁

初春

無懷

暖信初回宿草根茸茸漸可藉芳樽未須著意催花柳  
且為乾坤補燒痕

偶作

介清 二首

風遞山花入袖香  
日長無事倚胡床  
亂紅如雨春歸去  
杜宇聲聲喚夕陽

莓苔徧地榆錢滿  
院落無人柳絮飛  
信手翻書香篆冷  
夕光山翠上窗扉

經故人別墅

行端

門逕無塵有綠苔  
東風落日舊曾來  
白頭道者今何在  
一樹櫻桃華正開

孤嶼圖

大訢  
十二首

淡烟疎樹月朦朧  
路隔寒潮斷復通  
添箇茅菴分我住  
明年飛錫海門東

風雨歸舟圖

中流鼓枻欲何之  
乘興何如興盡時  
蛟鱷垂涎風作橫  
山長水遠暮歸遲

古廟折碑圖

古廟殘碑野水村  
行人回首暗消魂  
遙天何許孤雲沒

不盡青山萬馬奔

虞伯生學士以五詩贈上人蒙見及一公將歸  
蜀謁趙魯公次韻

潛宮樓殿五雲開  
雲外青山萬馬來  
黼黻天容歸化筆  
故應留待謫仙才

墨梅為馮仲實賦

林花瘦影月微茫  
風袂參差玉佩璫  
更覺微酸生齒頰  
千林烟雨待青黃

舟至通州夜雨大作

明日京華拂面塵穹廬如雪馬如雲雨聲未忍孤蓬別  
故遣蕭蕭枕上聞

次韻送廖天與

楚江送客暮帆開眼底何人識異材後夜月明朝又滿  
青山空繞雨花臺

魚樂圖

予作庵東園將謀退休而未能入居之  
希古禪師寄魚樂圖索題感而為賦

築室開池學放魚旋縈九島作江湖畫圖更覺烟波好



野水寒塘雪葦枯

畫馬

華山歸牧空龍種傳得丹青十二閑前歲上京聞扈蹕  
白雲如見六龍還

百雁圖

既集還飛水正深風驚葭葦亂擎音江湖尚爾防矰弋  
肯為傳書到上林

贈了空羽士

劍光電繞蒼厓裂阿母金盤進紅雪攜手一笑三千年  
更約乘黿拾海月

寄西山李處士

每憶西山水竹居秋風林影夕陽疎江湖正自無知己  
底用嬾人索報書

寄茅山道士梁中砥

覺思

白雲明月本無期君子長吟有所思鴈向石頭城畔過  
寄書安用牧鷺兒

山中吟

清珙九首

淒淒茅舍新秋夜  
白豆花開絡緯啼  
山月如銀牽老興  
閒行不覺過峯西

山厨寂寂斷炊烟  
凍鎖泉聲欲雪天  
面壁老僧無定力  
又思乞食到人間

玉堂銀燭笙歌夜  
金谷羅幃富貴家  
爭似道人茅屋下  
一天晴月曬梅花

山風吹破故窓紙  
片片雪華飛入來  
添盡布裘渾不暖

拾枯深撥地爐灰

茅屋方方一丈慳  
四簷松竹四圍山  
老僧自住尚狹窄  
那許雲來借半間

道人屋冷四檐竹  
長者門高百尺牆  
屋冷道人心愈靜  
門高長者日多忙

題出山佛像

頭髮髻鬆下翠微  
凍雲殘雪綴伽梨  
不須更問山中事  
觀著容顏便得知

肘破衣穿骨裏皮下山回首步遲遲父王休遣人來問  
顏貌不如宮裏時

送凌侍者回淨慈

十里湖光浸六橋到時須著眼頭高斷堤風暖揚花落  
不是鳥窠吹布毛

送鄉僧昱曉林四首

維則八首

海雨吹花雪作堆那時敲我竹門開自憐水國三千里  
也有鄉僧問路來

風沙風葉攪征衣今日江頭送汝歸  
西望故鄉何處是  
楚天漠漠片雲飛

鄉夢鄉愁我已疎十年不見故鄉書  
兒時聚首人如玉  
老大不知今有無

鄉人問我幾時還何道如今又入山  
一箇蒲團半間屋  
吳松江上九峯間

贈弟仁遠入京

錦袍花映鳳池明玉珮光搖紫府青  
富貴著人如醉夢

倚門慈母眼長醒

師子林即景

斜梅勢壓石闌干  
花似垂頭照影看  
白晝雲陰天欲雪  
半池星斗逼人寒

登茅山天市壇

白雲剪作瑤壇雪  
寒旭蒸開玉洞花  
山北山南看更好  
炊烟朶朶是仙家

一峯雲外庵和韻

碧虹分雨半山橋  
橋下春雷卷怒濤  
老衲定回開戶看  
隔溪聞盡野櫻桃

錢塘江曉渡

本誠 三首

雨後青山展黛眉  
暖風無力去帆遲  
人家一簇臨江岸  
綠樹輕烟映酒旗

客中九日

小橋流水遶迴廊  
獨對西風憶故鄉  
山崦人家秋色晚  
客中無菊過重陽



題友人壁

池檻水搖簾影動  
石床風引翠烟斜  
鳥聲啼足忽飛去  
驚落半庭山杏花

和楊廉夫西湖竹枝詞

僧信 二首

湖東日脚欲投山  
湖西月出牙梳彎  
南北兩峯船裏看  
恰似阿奴雙髻鬟

東邊高樓紅紫開  
西邊青山翠成堆  
吳兒盪槳浪花裏  
相賽唱歌船去來

聞杜宇

大圭  
四首

情知望帝是前生  
春盡江南憶錦城  
到處青山山有樹  
如何偏起故鄉情

戲成

城郭無心寄一瓢  
此身便欲老山椒  
山童忽報松花盡  
又逐扁舟上早潮

謝檄

謝檄歸來卧白雲  
祇今心事與誰論  
故人不似蒼苔好

歲晚青青一到門

夜起

野人獨臥山中屋  
夜半雨聲清夢熟  
起來竹下一開門  
秋入千峯月如玉

白龍洞

古洞深沈莫敢窺  
陰森草木野雲飛  
白龍何處淹頭角  
天下蒼生待汝歸

奉答宣讓王太子

克新  
二十  
八首

世皇枝葉茂千秋為國藩垣淮水頭聞說府中賓客盛  
小山叢桂碧雲稠

數椽茅屋數株松蒲榻高眠海日紅不是賢王招不起  
山人只合住山中

達丞相承恩詞次張員外韻

金壺玉露逐皇華黃土重封識內家宴罷省門扶上馬  
微風吹側帽簷花

名馬西來蹴雪濤大奴重刷錦雲毛也知不是尋常種

千騎中間獨爾高

寄三塔雲海和尚

雨後龍孫過屋長半池疎影月微茫  
鳳凰巢在雲深處  
日日銜花到上方

為清上人題竹

石湖春水碧連漪湖上春風筍蕨肥  
十載兵戈歸夢遠  
翠雲深擁鳳雛飛

憶昔丹丘侍玉京百年江海未忘情  
春風林館披圖畫

烟雨濛濛翡翠鳴

題畫

琪樹連雲雨露新  
半山樓閣擁金銀  
錦袍零落風塵際  
巖壑鶯花幾度春

子真谷口春耕罷  
牛背看山更賦詩  
啼鳥一聲茅屋外  
碧桃千樹雨絲絲

人生只合江南住  
一曲溪山二頃田  
紅稻吹香蓴菜美  
春花秋月自年年

空谷雲深山路遙一灣桃雨漲溪橋白駒皎皎人如玉  
幾度春風長蘢苗

山中宰相鬢毛斑兩箇青松屋一間草滿空庭春晝永  
看雲飛去看雲還

萬松深處一茅亭坐對匡廬九疊屏黃鳥出林春未老  
一溪花雨晝冥冥

霜落江山木葉空千巖脩竹夜生風蓮華峯頂巢雲客  
獨自吹笙明月中

題醜齋小像

拋卻朝簪下九天  
西湖風月一漁船  
蘆花夢覺魚龍遠  
又是人間五百年

題恢復初梅

雪消春色滿天涯  
南北枝頭總著花  
驛使不來歸路斷  
海風吹月照江沙

李煥章竹石居

解組歸來賀監湖  
萬竿脩竹一茅廬  
石根春樹排雲直



花影高連長者車

西湖景

蘇子堤邊楊柳春  
湖中簫鼓畫船新  
誰知歌舞繁華地  
回首東風吹戰塵

山色湖光雨後天  
兩邊樓閣麗蒼烟  
酒船歌管隨烽火  
花落花開啼杜鵑

次韻顧玉山題杭上人芭蕉

山寺春深積雨餘  
坐看花影上階除  
新詩吟罷無人到

只向芭蕉葉上書

次韻答唐伯剛斷事

平湖落日照漁汀  
風起槎頭欲挂罾  
城上倚樓看明月  
河東詞客水西僧

題趙清獻公圖送趙知州

携鶴歸來自蜀山  
畫圖今復幾人看  
秋風江海旌麾遠  
霜鬢蕭蕭鐵面寒

隱居圖

金匱要略卷十七  
戰馬多芻戰士肥總拋逢掖著征衣首陽商嶺無人到  
幾度春風老薜薇

輞川漁樂圖

華子岡頭輞口莊桃花春水漲滄浪先生投疏歸來早  
半世功名一釣航

畫松

長向廬山劒外看大夫應合拜秦宮女蘿倒挂絲千尺  
萬壑風霜幾歲寒

墨蘭為中上人題

鳳去岐山杳不聞  
美人空復憶湘君  
春風九畹香如海  
紉佩歸來倚碧雲

題畫

江樹花殘陰滿津  
移舟陰處理絲綸  
春醪如蜜魚如玉  
誰管飛龍是故人

贈夏君美同知

十載中吳戰伐多  
使君談笑罷干戈  
漢廷封拜論功爵

羞殺征南馬伏波

車溪道中

善住  
四首

葦白茅黃溪水清倚蓬閒看浪鷗輕板橋橫處人家小  
脩竹參天落照明

范蠡祠

越國謀臣吳國讐如何廟食此江頭扁舟載得蛾眉後  
却作三江汗漫游

張翰祠

季鷹倦作東曹掾千里思歸獨向東  
鱸膾蓴羹暫時事  
不知塵世幾秋風

陸龜蒙祠

聞說松陵此度過長虹  
偃蹇臥晴波往來不見天  
隨子落日西風有棹歌

春草池

法堅 二首

雪消春色滿江沱  
芳草纖纖覆綠波  
最是高陽池上客  
狂歌無奈醉時何

亭前脩竹淨漪漪  
烟暖沙頭杜若肥  
一夜雨餘春水漲  
白鷗日日到柴扉

越來溪

在吳中

半顛二首

九關風月醉傾城  
歌笑聲中有甲兵  
卻是吳王自亡國  
枉教溪受越來名

琴臺

在靈岩山

幾彈石上五雲深  
挑出湖波片月心  
絃外有聲誰解聽  
一山春樹曉鶯吟

元

附五言絕句

適興吟

合尊

寄語林和靖梅開幾度花黃金臺上客無復得還家

米元暉江山秋晚圖

大訢二首

紅樹宜秋晚澄江媚落暉扁舟如喚我莫待白頭歸

畫牛

草煖犢子肥牧閒牛耳濕誰知荷蓑翁風雨租稅急

桐下井

大圭二首



晚風吹銀床蕭蕭古桐樹時有新汲人瓶携落花去

江晚

長天鳥飛盡兩岸蘆花發何處一舟來清江上秋月

六言絕句附

無題

大圭一首

樹影半窻明月蟲聲一夜清秋我意浩然千古人間總是閒愁

書齋即事

本誠

逕遠松篁翁鬱日長庭院清虛大貴莫過學道至樂無  
如讀書



古今禪藻集卷十七

欽定四庫全書

集部

古今禪藻集卷十八

詳校官庶吉士臣謝恭銘

主事銜臣徐以坤覆勘

總校官庶吉士臣倉聖脉

校對官原任編修臣勵守謙

謄錄監生臣任嘉春

欽定四庫全書

古今禪藻集卷十八

明釋正勉釋性通同輯

明

五言古詩

和陶淵明九日閒居詩

梵琦

四首

閒居愛重九使我念陶生但取杯中物不貪身後名  
季秋霜始降向晚月初明草際亂蟲語林梢殘葉聲  
踈籬采叢菊小嚼扶衰齡美酒既滿樽一吟還一傾  
田園自

可樂主衮何足榮貴賤各有志好惡吾無情所以君子  
懷悠哉歲功成

和淵明中秋有感

皇天分四時白露表佳節最愛潭水清猶如鏡容徹蟾  
蜬出復沒絡緯聲欲絕靜卧深夜起仰觀衆星列流水  
可嗟吁附勢非俊傑身即大患本家無長生訣且餐薺  
下菊兼吸杯中月

和淵明新蟬詩

新蟬何處來鳴我高槐陰流水欲入屋好風自開襟床  
頭一束書壁上三尺琴琴以散哀樂書以通古今所幸  
車馬稀非邀里人欽虛名如北斗有酒不能斟縱洗爰  
居耳寧知鐘鼓音陶潛初解組蘇軾未投簪莫改麋鹿  
性常懷煙嶂深

送董國賢任奉化州別駕

滄江風露冷綠墊花草腓天遠孤鳥沒海深衆流歸萬  
賢少許可盛德方瞻依昨旦欣來聚茲晨悵言違直因

山川近良免徒馭悲握手多交舊名藩借光輝疲民望  
已深別駕未可遲簿領有餘暇道路不拾遺

次韻寄答江子寬先生

來復

采蒲涉東澗褰蘿度西林涼飈激清籟孤懷鬱如沈思  
君渺何許邈在三山陰草樹颯已秋感此歲月深高標  
不可挹何由散冲襟熒熒匣中劍浪浪繫下琴乖時不  
敢售價重千金黃金寄君道路遠况復多妖侵會當慚良  
遇坐石青瑤岑掃花弄朝日逍遙論夙心



空城雀

宗泐 二十  
三首

啾啾空城雀戀戀空城曲朝傍空城飛莫向空城宿草  
窠乳子成埽土翻身浴不隨鳳凰遊不畏鷹鷂逐野田  
豈無黍太倉豈無粟食粟遭網羅食黍傷箭鏃丁寧黃  
口雛飲水懷止足歲晚雖苦飢全軀保微族

江南曲

泛舟出晴溪溪迴抱山轉欲采芙蓉花亭亭秋水遠心  
非檣上帆隨風豈舒卷但得紅芳遲何辭歲年晚

短歌行

白日去茫茫清川流浩浩有生能幾何少壯忽復老王  
母蟠桃花萎紅不成好扶桑半摧枯枝葉墮羸島仙人  
王子喬兩鬢如秋草况聞安期生形容亦枯槁漢武與  
秦皇一生空自擾短歌詠至言庶以安懷抱

挽歌

陰風起枯楊寒日照衰草丹旌辭中堂輜車即周道親  
戚及隣里送者皆素縞一歸長夜臺萬古不得曉憶昔

盛容儀被服懷美佼今來朽腐餘復為螻蟻擾富貴與  
榮華滅迹空中鳥彭殤久已淪不知誰壽夭

從軍行二首

草枯馬不肥風烈衣盡破建牙帳外立枕鞍雪中卧倉  
黃火伴驚校尉點兵過

微霜下高城哀笳破新弄孰使耳邊來驚我還鄉夢家  
貧子尚孩寒衣復誰送

襍詩五首

羣邪可干正衆枉能矯直蕭條孤生篁隱忍在叢棘白  
壁竟何愆青蠅自懷慝公論苟不存孰辨夷與跖

伯陽西度關仲尼東浮海道大無所容一身置何在蘭  
蕙秋風前芳香竟誰采天道自茫茫知命不復悔栖栖  
止百年赫赫向千載

呂梁險可逾太行危可陟如何方寸間中自多荆棘尊  
前生白刃舟中起敵國一感睚眦瞋報之甚仇隙咄嗟  
難與居俯仰隘八極思欲凌風翔恨無凌風翼

禍福無定在倚伏誰先知於事既難料在理亦罔推西  
伯稱大聖美里却見縻況居千載下風教日已衰願君  
畧形累所存心不欺

魯連天下士片言能解紛千金博一笑永絕平原君高  
蹈東海上卷舒若浮雲清風散八表繼者今誰聞

采芹

深渚芹生密淺渚芹生稀采稀不濡足采密畏沾衣凌  
晨攜筐去及午行歌歸道逢李將軍馳獸春乘肥

冬夜憶清遠道初二兄

夜深霜氣寒窓月皎如燭鳴鴻尚逗征孤鶴亦驚宿念  
我平生親悵焉連心曲四明是何處苔溪如在目異方  
詎能通遠道何由縮十年無一字嗣音如金玉白髮漸  
欺人晤言安可卜

寓興

水草冬不死豈為寒所侵巖松風力勁歲暮青滿林念  
彼苦節士艱難持素心雖存太古操惜哉無知音守中

固有道庶為君子欽

柯生耕讀軒

耕田村外歸抱書窓下讀讀書期業成畊田待秋熟一  
飯充朝飢所願良亦足聖賢日相親志不在干祿白水  
涵春陂青燈照茅屋寵辱吾不知門前羽山綠

出峽圖二首

瞿塘水如馬五月不可下兩舟何處來披圖一驚驚詫前  
行稍趨平勢若閒暇者後來方履險衆篙不停把巖迴

古木披峽束，哀湍瀉嗟。爾駕舟人，安危在撻舍。

披雲卧丘壑，凌風脫籠樊。芳節忽已邁，朱明照前軒。嘉樹滋以綠，幽草萋以繁。丹雘耀庭戶，黃鳥啼林園。蘭澤涼芬起，高厓朝日暎。俯聽石潭響，仰看鵷鵠騫。佳期托縣圃，遐想踰昆崙。臨川有長歎，冀與智者言。

松石室

青青山上松，鑿鑿山下石。移來近禪居，窓戶生秀色。室中老比丘，怡然坐終日。轉境不在遺，觀心了無得。疎雨



灑新幄微風動蕭瑟所適不自知有喧與寂

雨花臺送客

梁朝雨花臺近在城南陌不見講經人空林澹秋色登  
高俯大江目送千里客白鳥下滄波孤帆遠山碧

送大彰徐博士還錢塘

白髮出都城青山引歸策涼風江上秋驚濤海門夕老  
驥厭長途倦鳥思斂翮芙蓉白露零惆悵遠行客

其二

流水出山外固不如在山孤雲度天際眇眇何時還伊  
余巖下客于今乃塵寰逢君一長嘯人生有誰閒

其三

累懷湖寺逢何時江城會況當秋夜涼明月坐相對來  
日非今日握手復一嘅相別無遠行出門即天外

偶地居

偶地即吾廬絕勝樹下宿不在千萬間安居心自足古  
人三十年辛勤乃有屋我無一日勞何必較遲速燕坐

白日閒青山常在目  
明月到床前更深代明燭  
几有寒山詩興來時一讀  
十日不出門滿堦春草綠

贈安古心還山中

子來能幾日遽有還山想  
長笑輕別離一策晨獨往  
舊房清澗阿夜雨新泉響  
門前嘉樹林陰陰夏條長  
即此人事絕遂爾長偃仰  
得句林花開彈琴山月上  
蕭散世念疎澹泊道心朗  
白駒空谷中誰能復羈勒  
何彼勢利人勞生在天壤

泊平望

宗衍

計程息勞牽日晚江路水連檣如有待聚泊就村井沙  
明鷗羣回月出人語靜心清獨不寐況乃風露冷因思  
往來客終日困馳騁得非衣食驅無乃緣造請吾人方  
外士素志慕箕穎胡為淹水宿混跡問鼃黽大夫別有  
念此意誰得領人生未聞道如何卧煙景

贈月池上人

圓珂二首

邀勝擬開池池成月臨水月非有意來水亦無心止洗

鉢鷗不疑為霖龍忽起筭沙是何人南游問童子

贈幻寓上人

聞道解脫人幻身隨所寓有緣月臨池無心風過樹御  
寒摘露荷行道修芒屨呼應甘馬牛死生任朝暮逢僧  
懶問禪疊足非求悟祖意眼前花田衣機上布忘吾境  
自間了課沙應數樵採同往來水雲或散聚十方一念  
周萬劫片時度笑我老化城因師開覺路

寒夜

戒褰

二首

繁霜瘁庭草長風振園條閉戶惜餘晷擁衲坐中宵流  
月澄清影過雁沉寒潦道人木石心不隨時物凋

薄暮丘中晚眺

薄暮雨乍歇眺望雲物饒山川日欲落衆鳥歸林遙數  
粒甘澤雉一枝足鷓鴣有水不洗耳無松寧葉瓢盤桓  
丘壑內皇風挹唐堯

山陰徐烈婦詩

守仁  
十首

我讀太史書遂知徐烈婦英英閨中柔落落氣如虎為

婦當徇夫為子當徇父生托結髮情死共一坏土寸鐵  
鏤誓詞全身赴火聚觀其倉皇際出處心獨苦使有健  
士力執仇在掌股既無生夫術一死真自許有生孰不  
死爾獨得死所日落青楓雲天黑巴陵雨長歌烈婦詩  
悲風起林莽

趣上人蘿壁山房

我懷雲林居夤在蘿壁下幽花落窓扉秋藤覆檐瓦重  
巒紫翠深中有忘機者壁觀坐來久風骨更蕭灑聲沈

萬境寂妄遣百慮舍何事支道林區區猶愛馬

題三香圖

英英粟玉花的的梅礬蕊依依兄弟情脈脈詩人意草  
木本無知殊根乃同氣我讀淮南謠臨風發長喟

題風雪歸莊圖

北風號枯林寒雲沒西嶺歸翁雪滿笠欲渡愁日暝孤  
舟斷磯下驚浪無時靜遂令世外人感此畫中景

孫仲善玄默齋詩



知白貴守黑處寂在忘語道人得此意澹然保冲素青  
山畫掩靄白雲暮來去欲覓全椒居落葉迷行路

題沈文舉窓岫卷

淮州有高士落落無常居辛勤五載間始就城邊廬開  
窓俯西野縱目聊自娛青山望中來白雲與之俱迢迢  
芳樹林濯濯朝雨餘良時會佳朋尊酒散襟裾豈無榮  
寵念窮達各有途山來不必麾山去不必呼萬事貴偶  
然矯飾非良圖疲盡子孫力可笑愚公愚

題孝子周仲南卷

蕭蕭庭前樹入夜風不息秋聲颯然來孝子情更戚陟  
岵念劬勞虞江渺無極精靈隔泉壤欲見那可即蛩吟  
寒氣深烏啼月華白起望東南雲哀歌楚天碧

詠適可齋

賢達處寰中何往非我適營營閭井間胡乃自勞役陶  
公辭五斗笑傲樂無極二疏散黃金都人重歎息所以  
高世士去就真自得聊持一壺酒獨醉松下石可人期

不來長歌海天碧

陳檜

在松江蘆浦靜安寺世傳陳禎明間所斲唐人有重玄雙檜詩宋徽廟取之雷震其一國

初猶存焉

苑苑雙檜樹傳聞自陳時陳時不可信重此根株竒下有左紐文上有再生枝天寒兩龍角月白雙鳳儀空山風吹雨木客夜題詩

鰕子禪

昔有僧知儼者性放逸曾渡江值漁者遇貴鰕一斗掬水啖之約酬以施貲弗獲漁

者怒仍吸水吐活鰕還之人皆駭異故名焉

嘗觀高僧傳心異鰕子篇今遊靜安寺目擊鰕子禪老  
禪真得道迥然息萬緣聊復示幻化遂奪造化先秋風  
響幽壑逸思凌雲烟自憐非槁木憂世常悵悵

追和歸源老祖山謳

普莊

長林悉凋落刮地霜風吹道人不出山終年無所知一  
心既空寂萬法將焉依海門明月上冷照枯松枝

雜詩

道衍

二十  
六首

仲尼昔在魯里呼東家丘誰知百王師聖德與天

侔要令臣子懼筆削成春秋遺經勸後來一變乃  
從周

祖龍并六國勢大莫與爭欲愚世上人肆暴坑儒  
生羣經化灰燼法令從吾行劇政若牛毛哀哉苦  
疲氓鴻鵠驟一舉四海如沸鎔不逢赤帝子天下  
誰能平

翩翩豪遊子錦衣耀青春時來洛陽陌走馬不動塵百  
金一朝盡惟仗劍隨身氣驕誰敢犯睚眦猶殺人遇主

固應難何由樹奇勲白日倏而逝青雲志莫伸有恩非  
不報不報婦人仁

幽花在深井天天艷春早獨有兒女憐不及路旁  
草一朝涼颺至繁枝盡枯槁自絕生處偏非是色  
不好

志士守苦節達人滯玄言苦節不可負玄言豈其然出  
處固有定語默非無緣伯夷量何隘宣尼智何圓所以  
古君子安命乃為賢

威鳳不常有來時必覽德祥麟不常生待聖乃一出二  
物非最靈應世曾弗急堂堂美丈夫寧肯事干謁際遇  
會有時何須重感激

雜詩

夜蛩鳴已寂陰火燄凝寒寥寥林莽間悄坐復何歡掩  
卷念同心去我良會難不憂山川隔但傷日易殘何如  
東流水寫此長恨端

擬古六首

同心復同邑一會還一歡如何去萬里杳杳會面難昔  
為比目鱗今作孤飛翰日夕慮不息離緒入雲端攬帶  
未暇結腰瘦傷圍寬茲時在遠道霜霰日已寒諒無同  
心友誰為勸加餐

良辰念難遇開筵當綺戶會我同門友言笑一何膴素  
絃發清商餘響繞樽俎緩舞出吳姬輕謳來越女但欲  
客拚醉觥籌那肯數流年歎焮馳有力誰得阻人生須  
歡樂勿使長辛苦



晨露散庭樹衆葉何旖旎繁陰蔽階除蔚若張  
綠綺行將掇其芳欲以貽彼美彼美與我違迢遙  
萬餘里微物固非珍意遠亦可喜奈何時不待徒  
使人興喟

還車候明發靡靡經山谷念茲道路難況彼時序促  
昔驚桑葉枯今顧蕙叢綠榮華非可貴飄忽即  
過目人能保貞德流芳亦自足毋將日虛棄腐化  
同草木

遠行情無侶  
玃玃出都闔  
不念人減舊  
但見墓多新  
松楸未成拱  
樵木已侵頻  
悲風日蕭蕭  
逝魄豈長存  
踟躕起歸思  
寧免淚沾巾

林垌氣蕭瑟  
歛驚已深秋  
月色生夜寒  
象緯光不流  
零露團衰蕙  
居人念重裘  
蛩聲階下泣  
雁影波間浮  
嗟彼意中人  
脩塗苦淹留  
諒非樂新知  
遂令棄舊游  
箕斗去雖遠  
牛女會有由  
浮名暫時事  
不如共綢繆

寄谿上諸友

獨坐白雲深常懷二三子幽齋俯花竹長溪渺烟水迢  
迢不可到惻惻那有已尋訪定何時短櫂秋風裡

送友人之松江得曙字

潮來沙磧平月落海門曙汀蒲轉風葉堤柳搖烟絮江  
頭春可憐天涯人獨去有歌送君行無酒留君住雪浪  
沒沙鷗雲帆出江樹回首讀書堆青山不知處

分金墩

夷吾坐窮乏叔牙計餘贏託友心相知義重黃金輕得

利詎敢私當道分還平獨遺一坏土尚寄千載名和氣  
產靈草秀色常青青至今往來者因之感交情

和徐一夔遊龍山

前山低易登後山陡難度亂石礙僧扉叢筠隘樵路行  
行倦欲歇寧待日西暮

味苦詩為一初賦

甘腴衆所歆苦毒吾乃喜味之曾勿厭八珍同其美簞  
瓢能久如鍾鼎豈常爾昔賢有遺戒刀蜜不可舐願言

膏粱人於斯當染指

石經山

并叙

石經山在燕之范陽郡峯巒秀拔若天竺山故稱曰  
小西天隋大業間有法師靜琬者處是山思聖教有  
難不能流通於是發願募緣敦工鑿石為板刊造一  
大藏經儲積于山以備其後法師首刊至唐貞觀初  
僅成大涅槃一部而法師乃卒其後子孫繩繩化億  
萬人乞錢粟刊造餘部歷遼與金然後完此一大藏

貯于巖洞者七地穴者二洞以石門閉之穴以浮屠  
鎮之自隋唐遼金及元碑碣森列照映巖野然而累  
經干戈無秋毫之犯洪武二十一年歲在戊辰春正  
廿一日也余奉旨往觀念法師之願力宏大堅固是  
山之泉石靈異清勝故賦是詩鐫于華嚴堂之壁雖  
未足彰法師之幽光庶以紀茲行之歲月而托其不  
朽也詩曰

峩峩石經山蓮峰吐金碧秀氣鍾慙題勝槩擬西域竺

墳五千卷華言百師譯琬公懼變滅鍊筆寫蒼石片片  
青瑤光字字太古色功非一代就用藉萬人力流傳鄙  
簡編堅固陋板刻深由地穴藏高從巖洞積初疑神鬼  
工廼著造化迹延洪勝汲塚防虞猶孔壁不畏野火燎  
詎愁蘚苔蝕茲山既無盡是法寧有極如何大業間得  
此至人出幽明獲爾利乾坤配其德大哉弘法心吾徒  
可為則

金太祖武元帝陵久經荒圯近奉詔修護歲時致

祭感而有作

金源古肅慎太祖當龍興滅遼如反掌想見武且英嗚呼大宋國在德不在兵未遂并吞志五國即殂崩瞻彼涿鹿山埋玉起高陵長松擁夜臺重巒蔽佳城秋風嘶石馬夜雨泣山靈蕪沒已百年今幸遇皇明芻蕘不敢入楸梧喜再青歲時營一祭亦足慰幽冥

送護西堂還武林

昨朝武林來今朝武林去流水與行雲何曾知去住鴈



送秋風帆蟬鳴夕陽樹悵望天東南青山渺何處

偶會柳莊袁寺丞

同居一城中經歲不獲見雲山千里外信知難會面今  
朝忽相逢握手情眷戀呼童急置酒丁寧休厭勸要湏  
醉復醉觥籌奚暇筭此會豈易得但恐聚即散彼此皆  
皓首滄桑頃刻變與君且盡歡莫問日蚤晏

笠澤舟中讀陶詩

扁舟泛烟渚涼森襲我裳推蓬坐其下四顧心茫茫斯

須展陶集諷詠殊未央儼同千載上攜手游柴桑先生  
得真樂厥志出羲皇回視晉宋人萬萬空相望況彼後  
來者應多瞻孔牆身栖草澤中心存名利場乃欲學其  
言儼和誠斐狂未諳織組工何能雲漢章里婦效西贖  
可笑醜愈張應物趣頗合子瞻才足當允言究臻極二  
子在其旁偉哉梁蕭統至論何昭彰於焉天地間萬古  
垂休光

夏四月余因清理佛教事自燕還吳客于西麓主

者家事忙不暇問於花木也今歲後山復生靈芝庭  
蘭忽結實秋海棠多被豪取余課佛之暇因感  
而賦

猗猗庭下蘭花開正春日幽香自襲人乃有君子德詎  
知雨露滋今年結其實青青疑佳果園丁曾未識何如  
南畝稼可給飢人食為物不適用雖貴有何益

其二

娟娟秋海棠人言斷腸草神農有圖經誰能為稽考處

陰乃榮茂近陽則枯槁其毒過於鴆不經亦可曉如何  
富貴家盆盎爭尋討不畏能殺人但愛顏色好

澣溪

青山兩岸分夕渡舟橫口夏雨欲生蓮秋風先到柳聲  
殘烟寺鐘香餘茅店酒相見無別人唯逢耕釣叟

山中讀書圖為劉仲言作

古春

十一首

金門有名士奉使東吳境鶴亭一相逢秋水雙瞳炯云  
在山中時讀書畫方永微言浩難窮妙理默自領流泉

和松風疎簾度花影所貴惜分陰唯學務三省悠悠聖  
賢心克念斯可景矯首懷故居白雲在峯頂

次韻送陽峯瀚南溟法師

我聞仙居好更愛陽峯名峯頭路十里峯下田一成深  
林多古樹冬夏常青青花明鳥偏樂境靜犬不驚南溟  
僧義虎道泰心自寧委蛇泉石宰廓落湖海情神襟秋  
水淨富貴浮雲輕觀光上京國一錫東南征長干龍象  
地花雨從天零飄然回故里恐寒鷗鷺盟江光相掩映

山色如逢迎臨池寫新作詞源三峽傾松花堪作供竹  
萌可為羹餘香溢齒頰夢寐心亦清西湖一相見爾我  
方識荆長天好風月滌慮同細評

送勗以純住長慶寺

珠峯鬱葱龍高絕人所仰維時春雨餘步屨綠雲上路  
轉勝地盤泉清筑琴響默樊觀化元妙閱恣幽賞空言  
動玄微遐矚倚虛敞晴花落緋衣宵燈炫金像曠劫累  
已消照世心獨朗道源本非遙超然謝塵塊

琴清為胡若思教諭作

微飈洒練衣空庭夜寥泚涼葉生露華澄江上新月冲  
襟澹無營孤桐絃白雪天秋萬籟鳴霜清百泉咽冥鴻  
度湘雲威鳳出丹穴至音聽者稀幽思自超越悵然一  
長吟烏啼漏聲徹

題趙子華復亨堂

人生宇宙內眇然若浮埃萬化吹索籥一氣成胚胎陰  
陽迭消長否泰相往來得興固為喜剝廬奚足哀滿盈

若弗戒天聞速如雷寒霜凋衆卉陽和在孤梅我歌復  
亨咏藹若登春臺

寄前寶林相本空

飛雲度江去瓊林化為棘山空流水間而我繼斯席松  
低鶴無巢苔深虎留迹蒼烟莽成虛鳥啼四山寂緬懷  
行道彰尚遺點頭石花落春雨餘幽逕望行屐

錢克敬雪石軒

錦山一片石太始雪猶凍春風吹不消曉靄欲浮動秀



出蛾眉尖影落羅浮夢動骨梅花清古色莓苔重積隄  
信愈堅抱玉羞自貢煉作五色雲將期補天空

醉琴卷

碧香非所嗜綠綺能醉心冷然萬籟作中有太古音妙  
彈不須指趣在山水深清風動寥廓白月流中林子期  
如可遇鑄以千黃金

殊別峯習靜卷

疾雷破山嶽大風揚波濤百川相蕩滴萬竅爭怒號道

人聞自性六窓鎖援猱喧寂兩忘念月在中林高

張無為畫秋原晚趣為陳主事作

草木變黃落青山慰遲莫斜日下晴川歸雲翳高樹石  
田秋雨餘茅屋溪深處過橋一行吟悠然得真趣

三笑圖

天子臨潯陽遠公不出山胡為遇陶陸過溪開笑顏匡  
廬高九疊峻絕不可攀畫圖寫遺像清風滿塵寰

慕萱堂為王顯之賦

景隆 三首

北堂母已傾萱草何榮榮昔藉以忘憂今反為傷情萱  
草年年發母去無歸程衣線雖已緩杯棬潤如生幾回  
夢寐間恍聞機杼聲覺來不復覩怵惕徒縈縈

千金鄉為峽石管用和賦

慨彼千古人其心尚高義黃金豈足惜友道重交契所  
以千載間餘光照青史視彼蚩蚩徒邈焉不可擬尚有  
百世孫流風仰先世

觀谷村

海昌有遺民環居滄海湄揖讓存古風讀書憩茅茨澹  
然忘外營高志干雲霓開門見雙峽頓覺心神怡豈獨  
陶淵明賞菊南山陞

題靖節先生像

大同  
四首

濁酒熟須漉黃花老當採安得同懷人維時惜無在夙  
念賦歸來亮節終難改吁彼好爵縻勞君空有待

寄大宗幻菴法兄

長宵不能寐況聞寒螿泣起來視天宇開門月華入美

人隔我遙情腸自煎急安得弭攸思露下成獨立

挽溧陽華處士

秋風江上來撼我庭前樹而聞處士亡遽爾驚失措吁  
嗟復自云莫不由乎數時易在暄涼物榮百新故家業  
付子孫已矣何足慮

送中書胡宗蘊歸葬母

若人懷重憂倉忙就吾別銜哀復致言葬母心歸切即  
晨戒征途涼風吹短褐野草何蕭條流泉亦嗚咽我我

芙蓉峯秋色半明滅霞麓最幽奇  
便房啓深穴封植諒已終憑高望金闕

自誠

魯山 二首

眼將眙就枕腸覺飢即食物我陳兩間化母均埏埴人  
唯草一莖隨時恣生息百年苦無多矻矻勞心力龍駒  
斃良材翡翠傷羽翼賢哉塞上翁心不計得失

春有冬

于年春有冬于日朝有夕漂泊旅亭人忽爾歸來客堂

堂七尺軀明明夢窟宅青史數行字荒丘一片石人間  
竟無賴地下終何益但圖此生容入穴免逼迫若知養  
心術無欲乃良策

目瀾洲

廣原

何以悅吾目變化惟有瀾目瀾知有舉可以明性端源  
委罔不達沉浮兩無端彼動吾獨靜動靜何相干

徐郡侯白泉井

明秀

五首

長嘯下海門北望徒耿耿清風安在哉遺愛猶鼎鼎白

金匱山房集卷十八  
鷗野水闊黃鵠青天迴達人應不泥持此為心境當年  
甘棠樹今日白水井勿剪勿伐心以汲以引綆德澤流  
無窮江漢共綿永

冬日朱井南宅社會

郊外冬日晴梅柳含春景豈知柴墟里踐作禮義境  
翺社中客同赴仲容請爾叔竹林賢素髮已垂領光澤  
襄陽公歸閒二疏並付翁駕鹿車溪翁泛漁艇紫峽來  
滄洲高風等箕穎落魄劉將軍橫槊慣吟咏青徐憲副



駕不用僕夫整西臯魯郡伯詔養迹已屏緇衣雜繡衣  
雲泥交別頸邇來合餘歡花間延日永愛此風俗淳耕  
讀墟落靜比屋總羣從百口同一井晚來山翠寒天末  
秋鴻影田家濁酒壺罄飲燭可秉

畏厓謝醫士嵇秋澗

畏厓將及晨上巳歲甲申起視天南北悽悽作吟呻失  
勢不我知竹林動星辰墮地二三大呵護若有神衣裳  
足風露庶以全其身竇犬驚吠雲山鶯仍喚春走迎嵇

秋澗造化回天真連日投匕劑如氣轉洪鈞負君千金  
報憐予百年貧徒能心怏怏抵是語諄諄還持鐵拄杖  
一笑山花新

東莊

早作日未出暮息日已沒辛勤生事微全家但力食所  
願官長清於時省差役春禽如催耕寒蛩若促織籬落  
豈花開堂前梨棗實手把種樹書百年猶一日

感事

啄鳥搏雞雛翼異雞母護孤兒悲悍獨顏色失其怙黑  
風雨益暗同過前溪渡茫茫春水深骨肉不相顧

山居志感

永瑛  
五首

江鷗只馴水野鶴不受籠孰云遊方士肯為塵所蒙風  
清紫芝谷月白青蓮峯學道雖未晚尋師吾遠從

其二

嘉蔬植我園好鳥巢我樹樹枯鳥驚棲園荒蔬委露寒  
氣肅山林新芳颯然故物理有固然於何起欣惡

青春少年子

五陵從豪俠兩都曜青紫  
驄馬挾朱絃王門被珠履  
出入恃寵驕輝赫駭朝市  
借問山澤癯何如少年子

苦哉行用朱西村韻

我儋願無儲不願年饑荒  
饑荒民薄斂無粟充太倉  
我心願無歡莫使民悲傷  
悲傷有行役子去母斷腸  
淫雨苦不止乃為萬物殃  
重雲昏六合寒日慘無光  
憶昔漢諸郡黔黎仰龔黃  
刑罰不苟施格言挫豪強  
草木亦被

化熙熙皆春陽道傍無拾遺豈聞有豺狼緬懷千載上  
揮淚沾我裳

結交行寄友

古人重結交結義不結金今人重結交結金不結義小  
憤爭鎔銖大倫廢天地愚者固不知達者寧無媿吾慕  
漆園人揮金如礫棄三子崇淡交允作金蘭契

鄒東廓祭酒見寄九峯集賦答

法聚 三首

世道日以隘齷齪蒙埃塵緬懷九峯士凌畧丹梯雲笑

傲俯十虛煦然寰中春天風振寥廓玄機發靈真妙道  
皆神奇詎云患有身飽啜貴玄酒淡薄味自珍

題贈天元圖意

采芝白雲谷邂逅蒼髯翁手攜紫筇杖來自峨眉東謂  
昔楞伽巔失脚塵海中茫茫不知返日月如轉蓬既擲  
丹霞筆不臥維摩宮窮心雞足巖了法知所宗再新拈  
花旨一笑宇宙空浩劫入彈指誰始誰為終

明慎下山示之

我怪青山淺汝怪青山深  
關關黃鳥雛卑飛下高林  
風塵一回首白雲隔遙岑  
寰區苦炎熱母息惡木陰

雜詩二首

祖福

北風吹征衣天涯暮何之  
阻險川途迴道周多棗苑凝  
望陟高岡極目見海湄  
海宇曠且深黃鵠飛鳴悲  
願言附逸翮萬里長相隨

鷦鷯栖一枝適願不求餘  
偃鼠在滿腹安知海蕩如  
既無曠達懷寧免世所拘  
闊哉漆園吏逍遙示通衢  
斯人

吾所慕乘運逝見疎

屏跡

士墨

道路森蔭藜溪山且高臥白日無所為讀書欲寡過閑  
雲任去留習靜以為課芳春不知曉幽夢鳥呼破

白頭菴

臺山行者生而皓首神異頗多嘉靖初居此故名焉

性善

皤然一老叟來自無何有手攜紫節藜飄飄鶴隨後兩  
鬢帶秋霜未擬年多壽隱顯翠微中樵牧傳之久乞食  
向人間結菴倚山阜紫氣擁崖巔丹砂煮星斗乘興入



蓬萊相尋不相偶題詩細咨詢遺踪果非謬

匡山寄是堂

果斌

獨上香爐峯峯高豁人目下有千尺厓寒翠生松竹忽  
遇餐霞人丰神朗瓊玉青林石作牀丹嶠雲為幄此心  
本無塵清飈安用拂

過岫嶠山房贈李文饒先生

道林

秋高雲半晴鳥語山齋靜來訪丹丘人閉戶辜清興瑤  
草發幽香白雲見真性拂衣還梵天杳杳聞鳴磬

送伍九亭歸安福

方澤 二首

木落初履霜臨河送將歸流波一何駛北風吹征衣相  
見苦不早相別即遠道君當志四海我今空山老我有  
千金珠繫君羅衣襦光華諒不泯庶表長相俱

方山人研山見過

故人鴻飛客棄家如濯洗托身凌霄峯誓熏無生理心  
遠藿食甘形虛褐衣美目中無完人頗許寒山子昨來  
多與偕光華映冠履竊恐素絲化幽芳自今委

和答沂亭蔣僉憲

正念  
五首

淵明黃菊林李白青蓮寺草玄楊子廬賣卜君平肆四  
老真達賢千秋慕高異丈人乃其流鄉黨式慄懾

與璞上人叙別

楚人去已久誰獻山中英不聞歌白駒但見來青蠅而  
我塵土惡之君河嶽靈酒杯願須臾離思長冥冥

過南洲孫山人

彼美南洲士馥馥秋蘭芳舉杯酌素月散髮歌滄浪風

露夜何其軒盈水中央永言去城市結意在川梁

北征

玄冥何蕭蕭白日忽已晚游子行不歸北風衣帶緩層  
氷川上交舟楫力難返原野雪復盈馬僕同時蹇曠蕩  
父母期門巷日夕遠兄弟本連枝歲暮亦分散胡為好  
名爵營營自羈絆豈無高山登山高望應斷感彼陟岵  
詩憂心轉煩亂仰首鸞鳳翔鴝雛得相將回首蘭桂列  
疎遠必成行覽物各有以於焉獨無傷歎息失循步涕

然熱中腸安得春風  
萱樹之臨北堂安得棠棣花比立  
含輝光眷言沐休德錫類永不忘

蘭谷

幽蘭當青春空谷寄白日念此山中人鳴琴坐瑤席  
春花何紛繁秋草詎狼藉  
荷帶風色柔荷衣露香緝覽彼  
衆物情因之申歎息  
締交良在茲佩服同金石

林居雜言寄同志

圓理二首

芙蓉謝春華霜姿耀中洲  
鴛鴦念儔匹孤棲何所求  
崇

蘭委深谷林杜生道周萬物各有時百川無倒流感之  
傷我懷端已義所仇顧瞻遠行客誰肯結綢繆請為林  
壑交得與爾同遊終歲混樵牧聊以忘世憂

送別友人

江水東北流鳳凰西南翔念子丈夫志遨遊之四方平  
明發車騎肅肅臨周行河梁一分手感此離別長諒無  
凌風翰送子俱遠揚願為帝鄉雲從龍成報章

古今禪藻集卷十八

欽定四庫全書

古今禪藻集卷十九

明釋正勉釋性通同輯

明  
五言古詩

紺圃即事

真可

卜居在野曠寂無塵俗想疎鐘深夜聞六根瀉清響晝  
讀天竺書幽窓思忽晃犬吠桃花陰麥浪人來往最愛  
晚雨晴空林返照爽

知希詩贈王德操

德清

玄象未易覩太音非可聞  
巴歌壓雪曲下里排陽春  
楚人疑鳳鳥仲尼哀麒麟  
豈不為世瑞所遇非所親  
耳目素不接誰能辨其真  
太牢嘗海鳥章甫資文身  
投之非所好憂悲增苦辛  
俗習固有常貴賤安可論  
洗耳潁水陽高蹈東海濱  
漆園固有託詎不懷所珍  
之子抱奇思翩翩邈風塵  
迷方日已衆微言難具陳  
撫膺發長歎衷曲誰為信  
出關豈慕遠遯世甘沉淪  
良由知者希所以



稱至人

讀顧九華知非庵

希復

大化羅萬殊所至由乎一善善而惡惡聖人體其極厥  
是既有歸一非熾然立所以在蘧瑗朝思繼夕惕行年  
殆五十順逆始具釋事至輒隨行無過與不及賢哉華  
山子視之以為則著書曰知非洞然明我跡永垂金石  
言式昭彼邪慝

掃長水大師墓雪

真謚

同雲千里暗雨雪七日多祇樹珠交結古塔銀嵯峨南  
圓余舊業莊嚴復如何躡屐獨自往樵采蹊徑訛鳥雀  
絕不喧草木亦已皤前修有遺蹟長水宰堵波積素表  
梵行堅冰喻尸羅佇立邈年歲四百春秋過竊忝眇遠  
孫埽除倚中阿運帚拂其上風起搖松蘿石繞復再拂  
彌天曜義和清淨本自然斯言良不磨

贈陸成叔

洪恩  
二首

志士不偶俗甘與貧賤宜棟梁棄不錄輪囷先容資閭

娜不自銜鉛華賁戚施舉世事雕鏤荆璞反見遺駢驪  
繫其足駕駘寶先之所以阮步兵乃有窮途悲茫茫四  
方塞眷言欲胡為

重陽前一日姚使君招集綺霞閣

阿閣峽空翠俯矚江漢流雲際表楚岫水痕落吳洲丹  
樓映霞綺芳氣颯然秋感彼黃花候坐理南山悠娛君  
丘壑趣賞我物外游百年慨往逝六代堙沉浮何如飯  
薇蕨聊暇以消憂

招隱詩

僧悅 五首

躑躅心自夷恬此欲安之秀木迴芳薄秋蘭媚幽姿雲  
構希千章貴足適一枝嚴霜凋飛榮良無百歲期

懷友

天際有真人幽懷在深谷澹然物慮遺適此天下足冠  
蓋四方來珊珊曳鳴玉靜嘯月中聞山水發妙曲

志感

招要良不偶寄託有深緣高步陶遠右放神義皇前空

林倒夕景絕壁飛寒泉寂寂龍象居述志在虛玄

題清華館兼訊何令升

恬愉聞在宥止遽見玄素非欲至世樂是此勞者務達  
心境自閒達境心自悟明月濯濯來清光滿庭樹

宛陽送吳用卿

振迹發奇况宛雒多嘉猷君子惜寸陰尺璧非可酬金  
石結交親骨肉豈等侔江河日夜馳天地古今浮丈夫  
局四海朔雪凝貂裘寒苦松柏姿千載懷殷憂

贈雲東

法生 二首

佩芳須佩蘭采山須采芝之子白足流炯炯珊瑚姿啓  
我離垢言遺我青楊枝欣然意自會執手平生知維時  
歲向暮盈野多葦蕀子行望林壑予亦從此辭

雜詩

天壤一逆旅日月雙轉轂高鳥翔層霄野獸赴遠谷今  
我鮮人累在衆恒幽獨朝來川上坐暮向雲中宿往者  
逝不留來者詎可卜陽燄非真波疇能侶馳鹿天秋肌

骨清葉落霜氣肅引杖起遊步盤桓撫松菊誰謂林室  
靜鳥雀喧下竹誰謂知賞希明月入我屋越此醉夢關  
生事良易足駕言補我衣春我新刈粟

古意

法濟

翩翩雙幽鳥雛時即同林依依三十年宛轉多好音相  
將養羽翰遂得殊衆禽朝來天風起飄揚上嶽岑一飛  
一追隨飲啄豐至今既遂凌霄志安問銜環心

覽鏡

德勝

山人無鏡照自謂顏色好一朝忽照鏡却訝顏色老日月迅飛電學道自應早君看桃李花無言亦枯槁

謝友人惠米

香積厨無烟何以留雲水謝彼宰官家餽我藍田米香生白玉饌光燦青蓮几伴侶共禪悅人天同法喜

哭伯母吳貞婦

伯母七十四一病歸窀穸孀居五十三辛苦披巾幘父兄欲奪移泣涕沾胸臆之死矢靡他骨凜秋霜白教子



不徙遷事姑慎朝夕恒曰未亡人事亡心如刺此道古  
今難誰為勒金石吾哭伯母詞五內空煎迫

雁蕩山觀瀑布

赤城下南走爰有神人宅龍雁佩嘉名合沓芙蓉國生  
烟羃層巒大海洗石壁日出遠水明雲吐長天白仰觀  
衆峯攢森羅若牙戟瀑布懸虛空奔流亘千尺蜿蜒玉  
虹翔光輝寒電射謾謾高松鳴淒淒團霰擲噴沫散輕  
霧停影紛裂帛日迷風雨秋歲凜鬼神夕迴颺應呼至

亂洒衣與幘谷聲一何長  
浩如仙掌摑倒闕不測淵  
怒龍安可逆我昔遊匡廬  
觀泉已驚魄對此神冥冥  
歸來尚辟易

雜詩

落日迫西崦吐月銜東島  
逝景故悠悠人世漫浩浩  
所思耿中情憂愁怒如擣  
宴會苦不常容顏徒自老子有  
鼓與鐘勿伐亦勿考一委溝壑中  
身名腐同草

秋夜與羅吉甫同賦

夕露鳴蟋蟀秋風動楊柳  
嘉候苦不常芳華詎能久  
野

老話東臯故人依北斗親疎貴與貧身世無何有真境  
總會心萬理弗挂口感物木偶形撫化柳生肘寫此石  
上琴醉以山中酒

燕中述懷留別諸友

乞食離江南一鉢四千里歷苦見道心未能了生死所  
以事叅游雲山林藜底禮足曼殊臺掉臂燕昭市不識  
諸王侯獨念數君子世事等空華年光逐流水關河落  
日昏城闕秋聲起破衲風塵中故林荊棘裏長揖歸去

來殷勤謝知已

過雲山居士淡泊齋

法果 十三首

金閭與毘耶不隔數武地何物是塵勞有生隨所寓檐  
花破喧寂野鳥窺真趣豈其善聲色轉向聲色避况彼  
隨緣流定動超凡慮胡必匿煙蘿然後為歸計空齋淡  
泊名吾知有深意世事從其煩孤雲自迢遞

樂府雜曲八首

瓦礫滿階頭羣兒打階口爭在輸贏前擲在輸贏後

馬頭十分高馬頭十分低下與紅塵接上與紅塵齊  
女兒啼得傷傍人爭斷腸口口哭前夫心心迎後郎  
朝菌不終朝劉生最明透路死路頭埋荷鍾隨身後  
耕筆非其時不若去耕野抱瑟倚高門取笑吹竽老  
世忌捉花莖毒蛇傷手足更有練虵翁阿嬌貯金屋  
蛇質化為龍其文終不變豈非堯心腹猶是跖顏面  
新月日就明殘月日就暗君子與小人中間影相濫

山居雜咏二首

人情獨尚煩天道從來簡白璧不全身黃金能換眼破  
觚貴復園歌器惟嫌滿深井汲秋雲詎知吾綆短  
寒蛩泣東壁哀響流西館疎花夕露滋弱草繁霜剪良  
哉宋玉悲過隙秋陽短對茲風木音因傷歲時感

所思二首

倉庚方始鳴倏焉屆秋杪蚤歲事行役躑躅悲衰老脩  
途遠遊奔生死良苦惱負茲結髮親於邑殊難道空牀  
有餘塵征路無常飽嗟嗟人之生不及鴛鴦鳥王事敢

云疲投歡苦不早恩情日以衰奚啻如秋草草枯萌有  
時佳人覲無期涼風一何厲旦夕空嗟咨嗟咨復嗟咨  
涕淚紛如絲

賤妾委空房曷不霜與霰良人天一方顏面寡相見豈  
無機杼勞終歲不成綃豈無室家私徒抱衾裯戀睇彼女牛  
星一夕猶歡讌咄嗟夫與妻永隔平生面一葦信可抗勿曰  
阻河漢秋風幸旋歸曷辭繁露泣思彼故人心腸似車  
輪轉悲思夜未央目斷雙飛雁漢廣莫可涉故情中道

裂惜哉不見知己矣勞中熱吁嗟復吁嗟蕙帳空涼月

贈莊我同山人

如愚 七首

人生各有志奚必貴與富不作人中龍即作書中蠹不  
作極寵媵即作未嫁嬭日月蜨轉九天地蟲處袴芥子  
大形骸須彌山憂怖佛性穴鼻鍼塵勞線難度世緣刀  
尖蜜舐之恐傷誤獲飽號良田足用稱武庫安步當高  
車不願乘殷輅窮交得良朋免生勢利妬爾家莊先生  
逍遙真足慕



贈別劉毘邪

本無緣而會豈有情而別為交深而思苦念異鄉而同  
客柳葉雖已青杏花猶未白問君何時行或者在三月  
寧結無情友不交有義人無情易解攜有義難分身花  
有並頭蓮魚有比目鱗此豈怯孤單天分義所親所親  
而欲疎安能不霑巾

贈丁元甫司馬

寸樊可鞠雀奚能繫鳳凰況御鳳凰者凡羽馬頡頏蹄

湔無蛟龍蟻蠓猶望洋沉駕蛟龍人庸鱗豈同行嗟  
蠓與雀得志騁榆枋蛟龍及鳳鳥失路轉彷徨雲雨有  
時會天地信翱翔蓬蒿無計取本非類所妨物各有其  
志時各有其方不以此易彼達者勿悽愴

其二

海深藉衆流山高賴積塵鵠翔託健翮龍飛恃潛鱗吾  
生天地間豈無知心人勿以一寸屈變爾尺蠖伸勿以  
九鼎堅磨爾志磷磷百川在瞬息榮名非所親取樂當

及時謝彼傲與信

皖山雜詠

白雲出山澤膚寸可成霖奈何市井徒枯槁甘其心白  
雲亦自貴每與泉石期莫逆兩無心何所不見知可怪  
塵勞者入山采石華不知白雲意徒謂林泉嘉林泉無  
白雲石華色不殷白雲有大惠世人那知恩白雲豈求  
報但畏有識笑笑彼白雲姿林泉徒照曜苟會白雲意  
林泉亦有趣誨爾巖穴人慎勿中道棄

贈緣如上足

緣如為雪浪師之孫

我從爾祖游爾年僅驅烏今爾為大僧我稱老必翦虎  
生三子必豹鷹生三子必鷄爾祖桃李門牆孰執任公  
之釣桶不度淮鵬不過濟越雞伏鵠善胡能洗上德哉  
人示爾窾啓曾師仲尼伋復師曾爾年茂壯爾志憑陵  
庶幾異日水寒於冰

秋興

明曠二首

大火倏以逝涼颼動幽林飛霞騁竒姿孤桐落秋陰願

言縱芳躅攀秀歷遙岑高視破宇宙曠焉開我襟靈賴  
妙激羽何必筑與琴感此事愉悅聊復送長吟之子出  
世者俛仰增遐心

過城南友人

侵晨理幽策出郭尋舊盟河流綠於染高柳風蟬鳴我  
友雅好事書畫紛縱橫契賞忽云暝涼風歸途生

寄如安兄

性通

紫芝方曄曄壘恥未全貧賢哉商山皓宇宙靡冬春無

悶徵實德隱約貴真純所以窮達士不與世情親

其二

莫買武昌魚魚腹無尺書遠望衡陽鴈鴈足空踟蹰親  
交在異方何以慰居諸永言保明德膠漆不相如

暮春懷仲連居士

廣製

憶昔隱士居斗室淨如滌竹香入幽窓林翠流虛壁雲  
與戒身閒月印禪心寂言尋野寺僧扁舟汎蘆荻

題古村圖

智舷 六首

仲夏喜無事披圖探野趣不離方寸間寫出幾村樹遠  
山勢重叠近水光吞吐鳥道入高冥人家在烟霧聞有  
幽棲士乃向此中住溪口挽釣船草際橫樵路伊人去  
已久逸韻宛如故掩映屋東西蕭條舊桑園至今有松  
菊如昔零霜露

簡道可法兄

頃讀蕉上詠疇不爾傾倒言外託微旨拙中寓大巧詠  
歌已臻此賞識應不少如何壯齒時不得展所抱遁跡

此湖山忘機如鷗鳥白雲與往還童子日圍繞長者未  
弱冠次者髮覆腦更有六七人聰慧益稚小有時瞰師  
出非蠻即闕草禮法未易閑天機不欲矯若問祖師意  
當下無不了相知寡老成熟若此幼好百年俯仰間取  
足便煩惱目前苟可娛此外一齊掃

題管仲姬山樓繡佛圖

須知相好身不獨鍼鋒現松風即佛聲山月即佛面當  
時管仲姬高窓作此觀



題畫天目松

鱗脫葉疎短骨立枝孤瘦偶蒙好奇者和雲移出岫百  
中難有一保得如茲秀唯有竹與梅可結歲寒友相與  
飽霜雪幸不如桃柳誰為傳此神決是首陽叟貞心而  
勁節餘人未必有

夏日南巷諸子見過二首

偶然憩南野高蔭欣古木室中晤言稀樹下坐忘獨枉  
棹來故人逗浦看新竹深林長閉門豐草高于屋何物

款素心願言宵炳燭

野處雖已適久不聞高詠炳燭夜何短含毫曉未竟涼  
雨原上來洗我竹林淨荷池漲莫知松簷溜可聽小舫  
勿遽還出浦風波勁

南還金閭與玄海師夜坐

廣化 二首

我從江上還師在丘中住白雲本無自那能詰何處淡  
淡雲水姿悠悠客中味惜別半載餘月明在庭砌梅香  
岸上花懸我枝頭錫不減東歸音壯我南行色念茲良

夜永徘徊不能寢因之發長歎薄世良為警坐別孤燈  
寒春風灑苔席願言盟此心雙眸青歷歷

曉發江上

北人車馬便南人舟楫慣不辨路何從行行迫清旦水  
禁有嚴官星燈飛驛傳客瓢冷如水早已辭征翰一道  
平江行仰視星河爛帆破水中烟凍解沙頭纜去留何  
所營家山薄雲漢日月疾如駒流光不容線歸乎復歸  
乎天地悲遲晚

送雪竹還楚

大泓

送子雪水郭寒江正渺渺何物擾離情長短亭邊草草  
綠長亭邊萋萋沒遠天心牽隨草色同到楚雲前

挽錢母夏太君

成覺

木落霜景淒寒風慘蒿里俄登清獻堂獨惋夫人死吁  
嗟雙玉麟泣血濺流水回首顧愁雲悠悠何處是

同錢抑之陳幼常尋郭外諸寺

通凡

四首

二妙青雲姿偕余發幽興風日殊清和郭外覽名勝欲

覓昔所遺渡溪且穿徑寺破僧轉貧碑荒字難認水西  
鳴磬殘林杪落霞刺三匝繞浮屠無生願言證

寄顧善長

鷦鷯棲寒枝鸞鳳鳴高岡鷦鷯願終止鸞鳳圖翱翔因  
以中道棄兩地徒悲傷憶與子別離草木千山黃今見  
河柳青使我抽衷腸之子遠馳驅豈不懷故鄉故鄉有  
知己念子常傍皇

胥山曲

行行復行行敝屣一何緩不嫌胥山遙但苦白日短

渡水吟

渡水為尋山尋山為逃俗望山可憐青弄水可憐綠

惜別會伯陽

如能

山中有佳景四時趣非一雲霞任往來花鳥無得失偶  
與賞心人閒步興逾逸坐石理殘經窺林看月出豈知  
良晤難久要不可必分手即今朝相期定何日因想會  
時遲元是別時疾

法相寺

圓信

古佛千峯下凌雲何迢迢空生栢葉香不逐秋風凋車  
馬任來去溪山總寂寥了知心無我示現若芭蕉

鶴林別業

明賢 二首

碧梧好顏色專待鳳凰栖鳳凰不見顧落葉委青泥人  
生有才質整駕攀雲梯良會失遭際踟躕白日低

其二

秦王策青山青山走不顧白日銷雄心雄心倏如霧我

愛竹林賢七子久已故對月洗心愁掬水弄明素

自蔡里登縹緲峯

大壑 三首

首旦集扶桑亭午別下蔡雞犬無絕聲崖泚有餘槩遺  
蛻塵仙靈遐探渺凡輩泠泠水一灣湖泖舒襟帶伊昔  
感離宮歌舞竟安在丹實垂芳林青壑瀉靈瀨飛錫凌  
雲端縱目窮海外襄城轍立迷懸圃路非隘河漢悲無  
梁都邑儼浮芥安得颺車來招予出塵界

夜渡胥口



夙懷洞庭志奄忽逾中年姑蘇織往來肆眚凌湖煙天  
吳驅石尤幾度不得前安知形與神從此遂踣蹠既結  
餐霞人采芝商山巔玄棲與淨域一攬不欲旋分衛眾  
香林郡邑寧足宣秋飈忽禪序客興隨變遷蘋香醉宿  
鷺蓬影驚飛鷺四顧莫辨野一指渾迷天銀漢湛於洗  
金波流欲然率爾崦嵫外圓魄翻虞泉吳歆厲清響楚  
調發靈篇漁子喧辭渚榜人爭聚川感君締好情猶為  
夢所牽

自包山寺入毛公壇

蕭晨不能寐，蕭軫從游豫。  
澄溪厲淺深，碧嶺逆烟霧。  
井漂瘞豐莽，壇荒森道樹。  
昔惟虛北間，亦有劉根寓。  
安知窮巖裏，寧絕化人遇。  
林端湖影翻，石側溜微汨。  
帑影曠不接，歷勝想所度。  
丹橘剖瑤霜，朱草塗白露。  
仙馭颯流飈，天階止跬步。  
回首徒興悲，游方焉所慕。

雜詩

斯德二首

翹翹倚梧樹，孤高出林杪。  
涼風吹一葉，大地驚秋早。  
星

火夜西沉白露被衰草寒暑互相尋繁華豈常保緬想  
人間世羣動紛擾擾隨分得逍遙鵬鷗同為鳥莫大于  
秋毫太山謂之小舜華豈不禁大椿有時槁萬齡同日  
暮達觀甚明瞭海水變桑田下籌有神老二儀或崩墜  
杞人心悄悄惟有學无生劫塵一時掃

詠史

仕宦貴榮名結交徇知己知己者為誰陳餘與張耳二  
賢克締歡一時咸仰止相慕何其誠相期許偕死白刃

起睚眦銜怨于沒齒肝膽一燕齊久要焉足恃古來金石盟孰能善終始管鮑安在哉陳雷無復起淳風久不振世道日頽靡懷古心悠然感歎胡寧已

雪霽

方擇

浦溟歛宿烟檐際照晴雪日出視東臯奪目寒光潔偶將拄杖去人跡徑尚絕何處啼鳥聲微翠露巖嶂

屏居山中寄南湖諸法友

弘灝

絃斷猶堪續草敗猶能綠每歎人不如云亡難再復伊

予感實深無生念轉篤竄身巖石間含真而抱璞止渴  
有清泉療飢有黃獨雖乏旃檀香墊華常馥郁所契良  
難忘引領勞雙目疇念菰蘆人足音響空谷

雜感

如曉

鸚鵡調好音久繫樊籠裏鷗鳥無美聲江湖任飛止本  
是同卵生巧拙分憂喜歧路何紛紜已學叅寥子

出林

有引

正勉

三首

予墮地十四年每念生死遂稅駕五濁頂禮法王越

三載祝髮追賦一章以謝故知兼自勵曰非林臥人  
矣

林臥十四年讀書徒潦倒試翮培風遲俟河白日老不  
見日及花黃昏落蔓草所以水月姿杖錫出林早

頓悟

已處空華界未作空華遊寄書辭援鶴個儻蹈三洲自  
負空諸取物色非世求囊琴貴無絃涉水貴虛舟

葵親

并引

先父母生余兄弟六人伯仲皆成立食貧予最幼鍾  
二人愛會已廿歲疾疫我母弗祿而父亦相踵下世  
明年四月感念生死出家胥山之古剎身為釋子業  
尚兼儒每誦蓼莪之什潛然泣竊自謂子於父母  
生養死葬人子恒職今既失生養而雙柩暴露一隅  
更獨何安越辛丑歲星冉冉一周矣乃以葬事謀諸  
伯仲俱以貧力不堪襄事又一載為壬寅冬余有方  
外遊欲速酬前願然又未能卜地亡何有從兄者憫

余孝思指祖塋昭次可權厝予曰生寄死歸何地非  
權乎遂罄衣鉢之資辦塋具因思禪衲不欲立文字  
破白業之戒然此一段苦心又不敢同淪黃壤况詩  
出性情之正昔賢所不禁于是僧而詩借文字以紀  
事縱有敗實之議余心甘之矣

昔遭家不造天步膺多圯骨肉既分崩恒產蕩無紀求  
髮方外遊一鉢為耒耜甕越故步孤雲任生死弱喪  
十二年耀靈急飛矢忽因回飈馳轉蓬歸故里風塵拜



雙樞銜悲不能弭六子非令人埋骨無寸址蓼莪化伊  
蒿瓶罄罍為恥遂捐分寸畜拮据營舊壘抵欲栖遊魂  
不貴圖龍耳緬懷鬻身賢負土奔若駛厥冬卜葬日執  
紼冰雪裏長恨抱終天苦海悲無底光儀蔑見期心戚  
如齧指愛水竭涕淚白雲徒陟屺生當未成童曷解羞  
甘肯死則為桑門喪葬禮不庀蓋棺論富貴臧否定沒  
齒一坏當佳城萬事苟已矣貴送无劒遺紀年聊樹梓  
鶴歸乏華表奠處虧壇壝薤歌擬白花啼鳥述哀詠靈

氣通破山孝思流長水余亦電露命胡能守裡祀須憑  
清江神年年薦芳芷

寒山訪雪谷師

智舷

寒山太湖東六月雪埋塢時有天耳師巢居類巢父春  
秋未半百氣骨自高古清泉凍連底蹲石怒獅虎此中  
除梅花無物入巖戶

四言附

夢萱堂詩二首

道衍

其萱陽陽形於我夢落月屋梁儼覲母容我侍母側笑  
言雍雍恍惚不見痛傷奚窮

韡韡其萱翼翼其堂有祿可養母矣云亡傷母之亡如  
割我腸夙夜靡寧雨淚其滂

焦山講場未竟有僧欲解錫歸櫬李因作此詩以  
送之兼戒之也

法杲

四首

迴風弄江江色上岸船深浪高笑語中斷

解一

蒼巘疊

足紅塵折腰畢竟飛錫何如挂瓢

解二

良眸矚天寒碧

萬里試一捫間花相亂起

解三

于彈指間雲颿瞥開白

月在樹回頭影來

解四

層淵毓珠頽璞韞壁摧光歛華

合咏三尺

解五

狡座儼肅拈花聚徒已破顏者歸歟歸

歟

解六

### 送空雲

雲物乃幻跡何西東倚空現質滅還從空

解一

金沙飛光

落日滿渡吳關楚關祇隔春霧

解二

舞櫂發艇彼何人斯

開波弄沫乘流去之

解三

霞天之根朶朶紺色匪江禽形

是衣裳

解四

沙閣樹短山遙水窮蹊跂斫額峭哉東風

五解

米珠謠

西星而東南星而北孤乳肖鬼丁壯司賊攔街者青挨  
門者黃妻孥在路父母誰湯身乎身乎何時殞乎

其二

日煎煎風獵獵斷苗根殺苗葉朝炊駭暮易子朱顏皴  
白頭死白頭何足惜人兒詎為食

贈余君獻

如愚

上天須龍行地須馬治帛歸工韞玉待價子抱瓌材天  
寧攸舍惶惶黔首危若倒懸搖搖社稷載覆載顛大人  
格君子其勉旃勉旃謂何即躬匪他天爵既至人爵斯  
多辟彼滄溟靡讓細河猶彼泰山惟高惟我日居月諸  
保合太和太和既保孰往匪道光雖未昇日出其杲聲  
雖未揚風則偃草聖王需材用支傾宇賢人冀位匪祿  
是取在昏為炬在旱為雨握髮姬公過門夏禹靡曰非

勤徒尊萬古子我同心薄言用深他山攻玉頑石礪金  
況同桑梓降志虛襟既索余贈余為子箴勉矣舍弘惜  
哉寸陰

懷同門友吳江

止勉

歲華代謝萬竅怒號參商入望心焉忉忉瞻彼陽鳥顧  
儔而慙矧伊人矣不念同袍

與子睽隔太湖之傍太湖雖廣一葦可杭跂望靡及烟  
水蒼茫中心莫逆珍重風霜

自昔同門師彼道林式今兩地撫景沈吟雖有焦尾誰  
為知音瞻彼白雲寶勞我心

客遊雖樂猶謂路難締袍之義古人所歎他山之栢可  
保歲寒薄言結屋與子盤桓

彤雲幕野霜霰淒其感彼歲暮中心遲遲我日既邁而  
月斯馳立身修業有愧良時

雙魚不達曷惠德音風飄敝衲念子寶深江梅落  
落朔雪陰陰願言把袂披我素琴



六言附

寄山中僧

道衍七首

鍊錫惟行磻谷葛衣不受埃氛百丈泉邊坐石千頭松下眠雲餐芝每呼樵伴采菌時驚鹿羣孤踪既留世外高風肯使人聞

轉應詞二首

新柳新柳掩映溪頭渡口長條未絆游人正是江南早春春早春早風雨獨行古道

斜日斜日門外馬蹄聲疾林栖鳥盡飛還霞彩紅銜遠  
山山遠山遠莫恠行人歸晚

張山人適見訪暮歸口號

隔水茅堂塵靜臨蹊松戶時開烟碧礪邊非草雲白山  
前是梅琴為知音一曲酒緣得意多杯今日乘驂且去  
明朝帶鶴重來

春日西溪即事二首

雲斷山峯遠遠樹迴溪路斜斜酒旗風颭村店牛衣日

曬田家喚婦鳩藏密竹引雛鴨聚圓沙人晚擢歌歸去  
爭先去折汀花

人家半依沙背舟子長停岸足楊柳三株五株桃花一  
簇兩簇斜陽澹澹牽黃遠水盈盈漲綠老翁忘却投綸  
因看晴鷗對浴

起宗徵公承旨內經館書記次楊禮部循吉韻

常時不妨論道暇日來叅老禪華雨濛濛雙樹藤蘿隱  
隱諸天細吟詩句久坐淨掃山床獨眠去夢不知何許


朦朧疑到君前

夢三秀弟

正勉

花冥冥兮月移燈青青兮曙時念萍蹤兮寥廓夢尋君  
兮天涯神為馬兮雲使披蒼霧兮遐馳風飄飄兮孤錫  
草萋萋兮相思山窈窕兮深入忽逢君兮採芝坐松根  
兮長嘯言來路兮多岐弄流水兮促膝鳥嚶嚶兮日遲  
愜素志兮獨往得附翼兮瓊枝既沾沾兮遺世樂深谷  
兮逶迤樹蓮花兮白業誓千秋兮追隨適春鶯兮喚醒

溯前境兮淒其轉思君兮若夢恍池塘兮題詩



古今禪藻集卷十九